

Voting Education Society (VES): Inspirasi dan Hala Tuju

Shahidah Abdul Razak

Fakulti Sains Pentadbiran dan Pengajian Polisi, UiTM Kampus Seremban

Baru-baru ini landskap politik negara telah menyaksikan perubahan apabila had usia kelayakan mengundi baharu telah ditetapkan. Seseorang warganegara Malaysia yang telah mencapai umur 18 tahun layak untuk mendaftar sebagai pemilih dan mengundi semasa pilihan raya. Dengan ini, bilangan pengundi dari kalangan generasi muda bakal meningkat dalam pilihan raya umum ke-15 (PRU15) yang bakal diadakan tidak lama lagi. Namun begitu, tanggungjawab pengundi muda masih dipersoalkan. Pengundi muda khususnya, Melayu (Bumiputera) adalah golongan muda yang akan menyumbang kepada peratusan undi dalam PRU15 yang akan datang dan Universiti Teknologi MARA (UiTM) merupakan universiti awam Bumiputera yang terbesar dilihat mampu untuk menggerakkan orang muda yang terdiri dalam kalangan penuntut untuk menyumbang kepada proses demokrasi dengan keluar mengundi. Walaupun mengundi masih belum diwajibkan lagi di Malaysia, namun kesedaran untuk keluar mengundi sudah mula diterapkan di beberapa peringkat sosial yang khusus.

Susulan kelulusan ke atas pindaan umur mengundi di Parlimen, penubuhan kelab Voting Education Society (VES) pada 2019 ini dilihat bertepatan dengan kerangka sosio-politik semasa di mana-

ia adalah cetusan idea oleh para pelajar yang terlibat secara langsung di dalam program anjuran Akademi Pilihan Raya Malaysia (APR), Suruhanjaya Pilihan Raya Malaysia (SPR) pada 2019. Tujuan utama penubuhan VES adalah untuk memberikan pendidikan kepada generasi muda di luar sana mengenai kepentingan untuk keluar mengundi. Ini adalah kerana tanggungjawab sosio-politik ini dilihat kurang diberi perhatian yang menyeluruh. Ahli-ahli kelab ini terdiri daripada pelajar AM110 Diploma Pentadbiran Awam di Fakulti Sains Pentadbiran dan Pengajian Polisi (FSPPP), UiTM Seremban Negeri Sembilan di bawah kursus "Government & Politics". Penubuhan VES telah dirasmikan sendiri oleh Pengerusi SPR terdahulu, Tan Sri Azhar Azizan Harun pada 26 September 2019.





Perasmian kelab Voting Education Society (VES) oleh Tan Sri Azhar Azizan Harun

Secara khususnya, kelab VES ini bernaung di bawah kendalian FSPPP sebagai sebuah kelab bukan akademik yang mempunyai objektif yang tersendiri iaitu memberi kesedaran kepada para pelajar UiTM khususnya golongan muda untuk menjalankan tanggungjawab mereka sebagai seorang pengundi. Fokus utama yang diberikan adalah bagaimana proses demokrasi di Malaysia ini boleh dikukuhkan dengan sebaik mungkin dan memberi peluang kepada pengundi muda untuk merangka satu bentuk perubahan sosial, politik, dan ekonomi yang hanya boleh direalisasikan melalui proses pilihan raya.

Wawasan kelab VES ini adalah untuk merencanakan lagi penyertaan dan pembabitan para pelajar secara tidak langsung di dalam perjalanan demokrasi dan politik negara. Melihat kepada perkembangan semasa dalam politik, khususnya pilihan raya, golongan muda dilihat tidak berminat dalam 'berpolitik'. Justeru, objektif penubuhan kelab ini dilihat masih kekal relevan dalam perkembangan politik semasa.

VES juga dilihat unik kerana kelab ini merupakan satu-satunya kelab yang mewakili generasi muda dalam usaha-

untuk menyebarkan kesedaran untuk keluar mengundi, dan bergerak bersama APR untuk memastikan agar objektif utama penubuhan kelab ini mampu untuk dicapai secara kolektif.

Pelbagai aktiviti telah dilaksanakan oleh VES dalam membantu memenuhi Key Performance Indicator (KPI) yang telah ditetapkan sehingga kelab ini telah berjaya untuk mendapat pengiktirafan sebagai kelab yang berupaya melaksanakan program berimpak tinggi. Sehingga kini, VES telah menjayakan pelbagai program pendidikan mengundi melalui program bual bicara, ceramah, sukaneka (explorace) dan juga sumbangan kepada komuniti.





Lawatan VES ke Pilihan Raya Kecil Port Dickson (13/10/2018)
dan Semenyih (2/3/2019)

Ahli VES telah menyertai pelbagai aktiviti yang dianjurkan oleh SPR, di antaranya ialah sebagai pemerhati di dalam beberapa siri pilihan raya kecil (PRK) yang telah diadakan di sekitar Negeri Sembilan seperti PRK Port Dickson dan PRK Semenyih di Selangor yang telah diadakan sebelum ini. Pengalaman sebagai seorang pemerhati pilihan raya merupakan satu peluang yang sangat bernilai dan tidak boleh didapati dengan mudah di dalam bilik kuliah. Oleh itu, pengalaman berada di lapangan ini perlulah dikecapi oleh setiap ahli VES kerana pengalaman sedemikian dapat menyumbang ke arah kematangan intelektual yang ditemani oleh kombinasi penguasaan teoritikal dan dapatan empirikal.

VES juga berpeluang untuk membuat lawatan ke Menara SPR sebagai salah satu daripada aktiviti-aktiviti yang diadakan pada setiap semester di bawah subjek Kerajaan dan Politik dan ia diadakan sehingga kedatangan pandemik global Covid-19.

Hubungan erat yang terjalin di antara APR dan pelajar-pelajar FSPPP telah berjaya untuk mengolah pelbagai aktiviti yang bermanfaat dan setara dengan objektif utama VES. Contohnya, dengan mengadakan lawatan ke lokasi-lokasi yang tertentu bertujuan untuk mendedahkan kepada para pelajar mengenai beberapa aspek penting yang berkaitan dengan perjalanan SPR yang terlibat secara langsung dengan proses pilihan raya di negara ini.

Dalam erti kata lain, VES tidak hanya tertumpu dan terikat semata-mata kepada aktiviti di dalam ruangan kampus. Beberapa ahli kelab ini juga telah menyertai kursus pentauliah sebagai jurucakap APR. Melalui AAT (*APR Associate Trainer*), beberapa ahli VES telah melengkap siri kursus bagi membolehkan mereka menjadi jurucakap kepada APR. Sebagai proses pentauliah kepada ahli VES, mereka dihantar ke sekolah-sekolah bagi memberi pendedahan serta pengalaman dalam melakukan simulasi proses pilihan raya. Maktab Rendah Sains MARA (MRSM) merupakan antara sekolah yang telah dipilih bagi mendapatkan pendedahan kepada proses pilihan raya ini. Sebagai sumbangan kepada masyarakat, VES telah mengadakan program bersama Sekolah Menengah King George V. Objektif aktiviti ini adalah untuk memberi pendedahan kepada pelajar sekolah menengah tentang topik Undi 18.



Program AAT di Maktab Rendah Sains MARA (15/10/2018)



Program Speak Out Loud di Sekolah Menengah King George V (22/5/2021)

Pihak UiTM juga telah mengadakan lawatan ke SPR dan pada 27/1/2022, satu MoU di antara UiTM dan SPR telah ditandatangani. Dengan ini, diharapkan UiTM dapat menggalas tanggungjawab penuh sebagai sebuah institusi pendidikan yang akan memberikan pendedahan kepada penuntut universiti tentang kepentingan keluar mengundi, selain VES yang juga berperanan dalam memberi sumbangan penting kepada usaha murni ini. VES dilihat bermanfaat, kerana ia merupakan kelab tunggal yang memberi fokus kepada amalan demokrasi di negara ini.